

• Вашлиймаш

ШҮШПЫК МУРАН ВЕРШӨРЕМ



Ятыр меропрятий сылнымут темылан эртаралтын. Лач тыгай поро, муро шўлышан шыжа тылзын Морко книгагудо пашаен-влак «Шўшпык муран вершөрем» сылнымут вашлиймашым эртареныт. Вашлиймашке кокымшо номеран школысо 10 классыште тунемше-влак, Морко калык театрын участникше, «Морко памаш» клубын ветеранже Галина Кузьмина да книгагудо пашаен-влак погыненыт.

Вўдышө-влак презентаций гоч Морко кундемын моторлыкшым, сылнылыкшым, поянлыкшым раш почын пузныт. Морко районын онарле курыкшо-влак дене, ужар сывынан чодыраж дене поян улмыжым ушештареныт. Кундемнан тўвыра поянлыкшым, вий-куатшым ончыктышо мурышо да куштышо ансамбль тачысе кечын ятыр. Марий кундемым чапландарыше, «калык» лўмым сулен налше

ансамбль-влакын, иктеш чумбырген, суап пашам ыштымышт нерген каласкаленыт.

Вашлиймашын унаже-влак видео гоч верысе коллектив-влакын мастарлыкшым куанен ончыныт. Морко калык театрыште модшо Галина Кузьмина тўрлө спектакль гыч роль-влакым шарналтен да «Пырыс» мыскарам устан модын ончыктен. Каласкалыме коклаште «Куан памаш» вокально-эстрадный студийын ончычсо участникше Людмила Александрова сылне мурым йонгалтарен.

Вашлиймашын тўн шонымашыже – самырык-влакым тўвыра паша дене палдараш, тек шочмо калыкын тўвыра поянлыкше нунылан эн лишыл да шерге лишеш. Чоныштышт марий тўвырам йбратыме тул ылыжеш манын ушанена.

Алена ПЕТУХОВА,
книгагудын краеведений пашаенже